

Starfsskýrsla Íþróttafélagsins Stefnis 2022

Stjórn Stefnis árið 2022

Á aðalfundi félagsins 12. apríl var kosin ný stjórn og er hún þannig skipuð: Svava Rán Valgeirsdóttir formaður, Svala Sigríður Jónsdóttir ritari, Þorgerður Karlsdóttir gjaldkeri, Dominik Bochra og Katarzyna Malizewska meðstjórnendur.



Íþróttastarf 2022

Íþróttastarf Stefnis gekk nokkuð vel á síðasta ári þó svo að við hefðum viljað geta boðið uppá fleiri æfingar fyrir börn. Á vorönn var í boði Íþróttaskólin HSV fyrir 1. – 7. bekk, sem var mjög gott þó meiri festa hefði mátt vera á æfingum. Það þurfti oft að fella niður æfingar. Ýmsar ástæður voru fyrir því, óveður, covid, olíuleki eða þá að kennarinn forfallaðist. Ekki náðist að bjóða uppá íþróttaskólann á haustönn sem er mjög leiðinlegt. Samstarfið við HSV- íþróttaskólann hefur verið gott en þó hefur okkur fundist vanta stundum frumkvæði af þeirra hálfu til að starfrækja skólann hjá okkur. Við gerum okkur samt sem áður grein fyrir því að vandinn liggur í því að ekki hefur fengist kennari til þess að kenna.

Við erum mjög ánægð með að hafa geta boðið uppá sund og leikjanámskeið hjá okkur í sumar, en þessi námskeið eru alltaf vinsæl og vel sótt. Við vorum svo heppin að fá Kolbrúnu Fjólu Arnarsdóttur íþróttakennara til að vera bæði með leikjanámskeiðið og sundnámskeiðið. Vonandi verður framhald af samstarfi við Kolbrúnu næsta sumar. Skráning á námskeiðin var mjög góð og krakkarnir sem tóku þátt í leikjanámskeiðinu voru mjög ánægð með það.

Þriðja árið í röð hafði covid einnþá smá áhrif á starfið hjá okkur, en í lok febrúar gekk yfir covid bylgja í þorpinu. Við það féll niður íþróttastarfið og jafnframt gátum við ekki haldið öskudagsball á réttum degi, en það sem við erum lausnamiðuð þá færðum við bara öskudaginn til um tvær vikur. Það var því gleðilegt að geta aftur haldið öskudagsball enda hafði það alveg fallið niður veturinn á undan vegna covid. Haldið var Víðavangshlaup þann 17. júní og var þátttaka góð. Leikjakvöld féllu niður hjá okkur þetta sumarið en það er vilji stjórnar að halda áfram að vera með leikjakvöld á sumrin.

Námskeið á síðasta starfsári

Fjölskyldutími í íþróttahúsinu: Foreldrum og börnum var boðið upp á frjálstan tíma í íþróttahúsinu einu sinni í viku.

Leikjanámskeið: Boðið var upp á skemmtilegt og fjölbreytt námskeið fyrir börn á aldrinum 7–14 ára. Kennari á námskeiðinu var Kolbrún Fjóla Arnarsdóttir íþróttakennari.

Námskeiðið var í 8 skipti frá 8. júní - 20. júní frá kl. 13:00 – 16:00. Eins og svo oft áður var þátttaka frábær á námskeiðinu. Veitt var á bryggjunni, farið í leiki, fjöruferð, Holtsbryggja skoðuð, Raggagarður heimsóttur, hjólað út í Staðardal, gönguferðir, útibingó, ratleikur og fleira skemmtilegt. Krakkar úr vinnuskólanum voru til aðstoðar ásamt foreldrum þegar þess þurfti.

Sundnámskeið: Boðið var uppá sundnámskeið fyrir leikskóla- og grunnskólabörn, kennari á námskeiðinu var Kolbrún Fjóla Arnarsdóttir íþróttakennari. Námskeiðið var í 8 skipti frá 8. júní - 20. Júní. Leikskólabörn (2018 og eldri) frá kl 10:15 – 11:15 og Grunnskólabörn frá kl 11:15 – 12:15. Mjög góð þátttaka var á sundnámskeiðinu, en þess má geta að góð samvinna er við leikskólann Tjarnarbær og foreldrafélag skólans niðurgreiddu gjaldið fyrir leikskólabörnin.

Íþróttaskóli HSV fyrir 1. - 7. bekk: Samstarf er á milli Íþróttaskóla HSV og Stefnis um íþróttakennslu fyrir börn í 1.- 7. bekk. Á vorönn var boðið uppá íþróttaskólinn tvisvar sinnum og voru aldursskiptar æfingar fyrir 1. - 4. bekk og 5. – 7. bekk. Þjálfari var Nicole Shering og henni til aðstoðar var Krysztófer Duda. Ekki tókst að fá þjálfara fyrir íþróttaskólann á haustönn.

Blak: Einu sinni í viku var boðið upp á blak fyrir krakka í 2. - 5. bekk og er það Juan sem þjálfar. Krakkarnir sem eru að æfa blak hjá okkur býðst einnig að fara á æfingar á Ísafjörð einu sinni í viku og hafa krakkar verið að fara líka á æfingar þar. Einnig má geta þess að Vestri blakdeild er með æfingar hér á Suðureyri fyrir krakka í 6. – 10. bekk. Mjög gott samstarf er á milli Stefnis og Blakdeildar Vestra.

Mót og uppákomur á vegum félagsins

Víðavangshlaup: Að venju stóð félagið fyrir víðavangshlaupi þann 17. júní. Nokkuð góð þátttaka var í hlaupinu en alls tóku 27 þátt. Atli Þór vann hlaupið þetta árið á tímanum 7.37.72 Sverrir Bjarki næstur á 7.40.12 og Friðrikka Líney þriðja á 8.12.09 og hún var fyrst stúlkna í mark yngri en 16 ára. Kacper var fyrstur pílta yngri en 16 ára á tímanum 8.44.27 og Sara Hrund var fyrst kvenna 16 ára og eldri á 10.31.52. Elsti keppandinn var Svava Rán Valgeirsdóttir og yngsti keppandinn var Rakel Lóa Atladóttir

Heimsókn frá KSÍ: Við fengum skemmtilega heimsókn frá KSÍ í júlí sem bar yfirskriftina „Komdu í fótbolta“ en um var að ræða átaksverkefni félagsins til að auka áhuga krakka á minni stöðum á fótbolta. Sigurjón Kristjánsson var með námskeiðið og voru krakkarnir mjög ánægðir með það.

Afmæli Stefnis: Þann 9. September átti Íþróttafélagið Stefnir 116 ára afmæli. Farið var í leiki með krökkunum á Freyjuvöllum, góð mæting var og veðrið lék við okkur. Boðið var uppá grillaðar pylsur og drykki.

Jólablak: Létt jólaæfing með tónlist og veitingum, allir mættu í rauðum fötum og með jólahúfur. Boðið uppá smákökur og mandarínur. Juan sá um æfinguna ásamt Þorgerði. Við fengum óvænt tvo skemmtilega jólasveina í heimsókn sem tóku þátt á æfingunni.

Öskudagsball: Vegna covid bylgju sem gekk yfir Suðureyri í lok febrúar var tekin sú ákvörðun að fresta öskudagsballinu um tvær vikur, til þess að sem flest börn gætu tekið þátt. Ballið var því haldið 16. mars í samvinnu við foreldrafélag grunnskólans. Mjög góð mæting var og allir skemmtu sér vel.

Þátttaka á mótum

Í samstarfi við blakdeild Vestra tóku Stefniskrakkar þátt í nokkrum mótum á síðasta ári. Má þar nefna bikarmót yngri flokka sem haldið var á Akureyri en það er gaman að segja frá því að Vestri U16 sigraði sinn riðil. Stefniskrakkar tóku þátt í U-12 móti sem var haldið á Ísafirði og svo tóku þau einnig þátt í blakmóti sem haldið var í Mosfellsbæ. Krakkarnir stóðu sig mjög vel á mótinu og voru sínu félagi til sóma.

Fjáröflun:

Dósa- og flöskusöfnun. Aðalfjáröflun félagsins er í formi dósa- og flöskusöfnunar. Á hverju ári eru farnar nokkrar ferðir um þorpið til þess að safna dósum. Þess á milli getur fólk sjálft farið með flöskur og dósir í skúrinn okkar við Íþróttavöllinn. Fisherman hefur gefið okkur þær dósir og flöskur er til falla hjá fyrirtækinu gegn því að við sjáum um að tæma dósakarið hjá þeim. Hefur það samstarf gengið vel. Við viljum þakka þeim sem styðja félagið á þann hátt að gefa okkur flöskur og dósir. Flokkað var úr dósaskúrnum tvisvar sinnum á síðasta starfsári.

Áramóta- og vorhreinsun: Stefnir sér um hreinsun á rusli sem til fellur vegna flugelda um áramótin. Einnig sér Íþróttafélagið um hreinsun á rusli á Suðureyri á hverju vori. Alltaf er mjög góð þátttaka í vorhreinsun og boðið er uppá grill eftir hreinsun. Greitt er fyrir þessa vinnu í gegnum þjónustusamning Ísafjarðarbæjar við HSV.

Vörukynning á Fisherman fiskibollum: Stefnir var beðinn um að vera með kynningu á fiskibollum frá Fisherman á meðan á með tónleikum 66°N fóru fram í Bryggjukoti um páskana. Greitt var fyrir þessa vörukynningu, mjög góð fjáröflun fyrir okkur.

Sjómannadaginn: Félagið var fengið til að grilla pylsur á sjómannadaginn og fékk borgað ákveðna upphæð fyrir það frá Sjómannadagsráði. Allir voru ánægðir með þetta fyrirkomulag og pylsurnar runnu út. Mjög góð fjáröflun fyrir okkur.

Styrkir sem félagið veitti á árinu

Hægt er að sækja um styrki í dósasjóð Stefnis til að standa straum af keppnisferðum, skiptir þá ekki máli hvort að viðkomandi sé að keppa með félaginu eða öðru félagi. Hins vegar þarf viðkomandi barn og/eða foreldrar að hafa tekið þátt í dósasöfnun með félaginu. Nokkuð var um að styrkveitingar á árinu.

Svava Rán Valgeirsdóttir formaður Stefnis

Suðureyri 28.03.2023